

天公面烏烏 江秀鳳(四縣腔)

這恁多日，日頭心情當好，日日就帶等笑面出來分厝看，毋過春天後哀面，看電視个氣象報導，講這兩日會作寒，故所有著較貴个衫，氣象報告旦旦毋準，天時還係熱（火霍）（火霍）仔，害厝熱到緊出汗，因爭著忒貴，故所無法度脫忒，熱到連頭那毛就濕忒，續來熱著，頭那昏昏盡艱苦，歸身仔虐虐削削，當毋鬆爽，背囊項个汗黏等衫，濕浴浴仔，黏黏泱泱，還得人惱哪！

今晡日天時預告講，會轉寒，又著長袖出門，日時頭，日頭走出來寮，熱到佇毋著，又盡翕熱，晒到人慊慊，無半息精神，今晡日又有體育課，學校旨換熱天个制服，本本著長袖，當晝 11 點零个時節，有一個同學熱到昏忒，分人扛到保健室，先生正喊大家入去教室，係無，下一個昏忒个就怕係厝了！

下晝放學个時節，嘎轉寒起風，風一陣一陣咻咻滾，厝摺領仔拉高高，同頸根圍起來，毋過仰般擲就無效，實在還寒哪！日頭仰會講變面就變面，等巴士个大馬膠路風脫體大，連圓身、手腳都寒到耐毋得，天公面烏烏，烏雲在東片析一路飛等過來，無三分鐘大風大雨啵啵滾，又無店亭下好寄雨，一下半就旋旋風分大雨涿到澇澇，歸身仔像在陂塘肚撈起來个魚仔，水浴浴跌，就在這央時，厝愛坐个巴士來叻，厝遽遽擎手愛坐車，運轉手怕係看厝歸身澇澇，車牌脣淨厝一儕人定定，欺負厝係一個學生仔，詐無看著直直駛過去，厝跔等車仔緊走緊攞手，路項个大人看著乜摺厝 ten 喊運轉手停車，人兩隻腳巴士八隻輪仔，腳短短个細人仔仰會逐得著巴士，無奈何又在大雨肚行轉車牌，下二枋車愛等二十分鐘久，企到無遮無抵个車牌，風吹雨打，分雨打到皮肉當痛，天公伯个面緊來緊烏，雨越落越大，頭那毛、衫褲全濕淨淨，衫尾攏起來擻水，大嫵嫵个水比屋下个水道水還較大管。

等到下一枋巴士來个時節，厝還係擎手緊攞，這個司機較好心停下來分厝上車，一上車，分厝行過个所在全係水，大家就緊看厝，厝試著盡敗勢，車頂有當多位仔，乜毋敢坐，企到較背角个所在，圓身个水還緊跌，等厝昏醒過來，正知車頂个冷氣還冷，寒到緊顫，連等哈啾哈啾打幾下下，脣項坐等一個細阿姐仔拿一疊衛生紙分厝，該央時正知自家鼻流鼻串，毋知流幾久仔，摺細阿姐仔領頭承蒙一下，就遽遽擻面擻鼻，轉到屋就壞蹄了～發燒了。

2018.4.26 在台中 55 路公車回程